



## USLUGE SAVEZA:

### • PRAVNO SAVJETOVALIŠTE:

Selma Fišek, viši saradnik za pravna pitanja

[selma@sogfbih.ba](mailto:selma@sogfbih.ba)

### • FINANSIJSKO SAVJETOVALIŠTE:

Gregor Jurišić, viši saradnik za finansijska pitanja

[gregor.jurisic@sogfbih.ba](mailto:gregor.jurisic@sogfbih.ba)

## KORISNI LINKOVI ZA FONDOVE EU:


[www.southeast-europe.net](http://www.southeast-europe.net)  
[www.adriaticinnovationmap.eu](http://www.adriaticinnovationmap.eu)  
[www.adrioninterreg.eu](http://www.adrioninterreg.eu)  
[www.europa.ba](http://www.europa.ba)  
[www.cbibplus.eu](http://www.cbibplus.eu)  
[www.cbc.bih-mne.org](http://www.cbc.bih-mne.org)  
[www.srb-bih.org](http://www.srb-bih.org)  
[www.interreg-hr-ba-me2014-2020.eu](http://www.interreg-hr-ba-me2014-2020.eu)  
[www.programmed.eu](http://www.programmed.eu)  
<https://tacso.eu/>  
<https://euinfo.ba/en/>  
[www.balkanfund.org](http://www.balkanfund.org)  
<https://eacea.ec.europa.eu>  
[www.welcomeurope.com](http://www.welcomeurope.com)

## ADRESA:

Musala br.5/1  
71000 Sarajevo  
Telefon: +387 33 216 502,  
209 024, 209 120  
fax: +387 33 552 810, 216 502  
[savez@sogfbih.ba](mailto:savez@sogfbih.ba)

## PREDSJEDNIŠTVO SOGFBIH USVOJILO ANALIZU UTJECAJA PANDEMIJE KORONAVIRUSA NA FINANCIJSKU POZICIJU JEDINICA LOKALNE SAMOUPRAVE U FBIH: PANDEMIJA SMANJILA PRIHODE LOKALNE RAZINE

U srijedu, 12.5.2021. godine, održana je 5. online sjednica Predsjedništva Saveza općina i gradova Federacije BiH, na kojoj su članovi Predsjedništva SOGFBiH, između ostalog Analizu utjecaja pandemije koronavirusa na finansijsku poziciju jedinica lokalne samouprave u FBIH, inicijativa Komisije za očuvanje nacionalnih spomenika BiH o proglašenju Olimpijskih borilišta na Igmanu, Bjelašnici i Trebeviću nacionalnim spomenikom BiH, Prijedlog Uredbe o metodologiji utvrđivanja najniže osnovne cijene vodnih usluga u Federaciji BiH, prijedlog Federalnog zavoda za programiranje razvoja, te ostale mnogobrojne aktualne informacije i inicijative značajne za funkcioniranje lokalne samouprave u FBIH i život građana u lokalnim zajednicama.



Članovi Predsjedništva Saveza usvojili su Analizu utjecaja pandemije koronavirusa na finansijsku poziciju jedinica lokalne samouprave u FBIH, čiji je autor Gregor Jurišić, viši saradnik za finansijska pitanja Saveza općina i gradova Federacije BiH. Ova Analiza ekspeditivno i temeljito identificira, procjenjuje i predstavlja intenzitet utjecaja krize uzrokovane pandemijom koronavirusa na prihode i potrošnju općina i gradova u FBIH. Posebno je analiziran utjecaj na pojedinačne komponente lokalnih prihoda, najizloženije ekonomskim fluktuacijama uslijed restriktivnih obustava ekonomskih aktivnosti, te na segmente lokalne potrošnje, koji su najpovezaniji sa zdravstvenim, socijalnim i ekonomskim posljedicama pandemije koronavirusa. Također, u Analizi su analizirane i predstavljene i aktivnosti, mjere i prakse općina i gradova, koje su lokalne vlasti poduzimale s ciljem ublažavanja zdravstvenih, socijalnih i ekonomskih posljedica pandemijskih mjera, posebno u smislu olakšavanja finansijskih poteškoća restrikcijama pogođenim radnicima i poslovnim subjektima. Analiza ukazuje da su se općine i gradovi za vrijeme pandemije koronavirusa suočili s efektom škara, koji karakterizira nagli pad prihoda u lokalnim proračunima, koji je uzrokovan usporavanjem ekonomske aktivnosti i lokalnim mjerama fiskalnih olakšica i oslobođenja za pogođene poslovne subjekte, uz istovremeni porast dodatnih neplaniranih aktivnosti, troškova i obveza lokalnih vlasti u segmentima zdravstva, socijalne zaštite i ekonomskih poslova uslijed provedbe lokalnih mjera ublažavanja zdravstvenih, socijalnih i ekonomskih posljedica pandemije.



Nalazi Analize ukazuju, između ostalog, da su prihodi lokalne razine vlasti u prvoj polovini 2020. godine smanjeni za čak 26,6 milijuna KM ili 5,91% u odnosu na isto razdoblje 2019. godine uslijed smanjene naplate prihoda zbog usporavanja ekonomske aktivnosti kao posljedice pandemijskih restriktivnih mjera. Najveći pad su pretrpjeli lokalni neporezni prihodi, koji su izvorni vlastiti prihodi općina i gradova, dok je ukupni financijski rezultat lokalne razine vlasti u FBiH skoro prepolovljen. Pad prihoda lokalne razine vlasti je rezultat značajnog smanjenja naplate poreznih i neporeznih prihoda uslijed usporavanja ekonomskih aktivnosti zbog restriktivne obustave poslovanja u mnogim djelatnostima, te lokalnih fiskalnih mjera oslobađanja pogođenih poslovnih subjekata od obveze plaćanja različitih lokalnih prihoda poput zakupnina, komunalnih taksi ili naknada za zauzimanje javnih površina. Analiza dodatno pokazuje potrebu za neophodnim osiguravanjem više financijskih sredstava proračunima jedinica lokalne samouprave u FBiH, posebno zbog važnosti uloge općina i gradova u suočavanju s izazovima pandemije, i trebala bi poslužiti kao dodatni argument za potrebu jačanja financijske pozicije lokalne razine vlasti u FBiH. Preporuke Analize sugeriraju da bi više razine vlasti, u suradnji s jedinicama lokalne samouprave i Savezom, trebale pružiti potporu općinama i gradovima i uložiti dodatne napore u smjeru jačanja otpornosti općinskih i gradskih proračuna na fiskalne šokove putem uspostave posebnog stabilizacijskog fonda za potporu lokalnoj samoupravi u vremenima krize, te putem povećanja udjela lokalne razine vlasti u sustavu raspodjele javnih prihoda u FBiH. Izrada Analize podržana je putem projekta Jačanje kapaciteta saveža općina i gradova u BiH, koji financiraju vlade Kraljevine Švedske i Švicarske.

Na sjednici je razmatrana i inicijativa Komisije za očuvanje nacionalnih spomenika BiH, koja je pokrenula postupak za donošenje odluke o proglašenju Olimpijskih borilišta na Igmanu, Bjelašnici i Trebeviću (staze za olimpijski spust i veleslalom na Bjelašnici, staze za biatlon i skijaško trčanje na Igmanu, skakaonice na Malom polju na Igmanu, bob staza na Trebeviću) nacionalnim spomenikom BiH. Ovom odlukom bi se općinama Trnovo, Stari Grad, Hadžići i Ilidža onemogućilo provođenje vlastite (izvorne) nadležnosti i povrijedilo bi se pravo lokalne samouprave na odgovarajuće vlastite izvore financiranja, jer su ove općine vlasnici dijelova zemljišta, koji su predmet ovog postupka. Na taj način bi se proglašenjem Olimpijskih borilišta nacionalnim spomenikom BiH kršila prava općina Trnovo, Stari Grad, Hadžići i Ilidža zagarantirana Europskom poveljom o lokalnoj samoupravi, Zakonom o lokalnoj samoupravi FBiH i Zakonom o stvarnim pravima FBiH. Članovi Predsjedništva Saveza dali su potporu ovim općinama i otvoreno pozivaju Komisiju za očuvanje nacionalnih spomenika BiH na dijalog i sastanak po ovom pitanju, kako bi se osigurala zaštita prava i interesa jedinica lokalne samouprave, na koje bi eventualno donošenje ove odluke značajno utjecalo, te kako bi se raspravila sva otvorena pitanja između Komisije i jedinica lokalne samouprave u FBiH.



Malo polje, Igman

Predsjedništvo Saveza se očitovalo i o prijedlogu Federalnog zavoda za programiranje razvoja, kojim se Savezu daje uloga i odgovornost po pitanju vođenja evidencije strateških dokumenata jedinica lokalne samouprave i izvještavanja o njihovoj implementaciji.

Članovima Predsjedništva SOGFBiH obratili su se predstavnici Federalnog zavoda za programiranje razvoja, Federalnog ministarstva poljoprivrede, vodoprivrede i šumarstva, predstavnici Projekta općinskog okolišnog i ekonomskog upravljanja - MEG/UNDP i Svjetske banke, te predstavnici Ambasade Švicarske u Sarajevu. Predstavljeni su prijedlog Uredbe o metodologiji utvrđivanja najniže osnovne cijene vodnih usluga u Federaciji BiH i prijedlog Programa za unapređenje vodnih usluga u FBiH. Pritom su i predstavnici općina i gradova putem nadležnih Komisija Saveza iznijeli svoje zaključke, stavove i mišljenja na Uredbu. Predsjedništvo SOGFBiH je usvojilo sve zaključke Komisije za ustavna i zakonodavna pitanja i Komisije za imovinska pitanja, prostorno uređenje, stambeno-komunalne djelatnosti i zaštitu životnog okoliša po ovim pitanjima.

S obzirom da je Savez članica Mreže asocijacija lokalnih vlasti jugoistočne Europe – NALAS koji važi za veoma respektabilnu organizaciju u Vijeću Europe i u Briselu, imenovani su i novi predstavnici Saveza u delegaciji Generalne Skupštine NALAS-a, kao i predstavnici Saveza u delegaciji Bosne i Hercegovine u Kongresu lokalnih i regionalnih vlasti Vijeća Europe.


Rad Saveza podržavaju vlade Kraljevine Švedske i Švicarske.

*Nalazi Analize ukazuju, između ostalog, da su prihodi lokalne razine vlasti u FBiH u prvoj polovini 2020. godine smanjeni za čak 26,6 milijuna KM ili 5,91% u odnosu na isto razdoblje 2019. godine uslijed smanjene naplate prihoda zbog usporavanja ekonomske aktivnosti kao posljedice pandemijskih restriktivnih mjera, dok je ukupni financijski rezultat lokalne razine vlasti skoro prepolovljen.*

*Predsjedništvo Saveza otvoreno poziva Komisiju za očuvanje nacionalnih spomenika BiH na dijalog i sastanak kako bi se osigurala zaštita prava i interesa jedinica lokalne samouprave po pitanju Odluke o proglašenju Olimpijskih borilišta na Igmanu, Bjelašnici i Trebeviću nacionalnim spomenikom BiH.*

## ODRŽANA ZAJEDNIČKA SJEDNICA SKUPŠTINSKIH KOMISIJA SAVEZA OPĆINA I GRADOVA FBiH

Članovi komisija su razmatrali Prijedlog Uredbe o metodologiji utvrđivanja najniže osnovne cijene vodnih usluga u FBiH



27.04.2021. godine održana je zajednička sjednica dvije skupštinske komisije Saveza općina i gradova FBiH, i to Komisije za ustavna i zakonodavna pitanja i Komisije za imovinska pitanja, prostorno uređenje, stambeno-komunalne djelatnosti i zaštitu životnog okoliša. Ovoj online sjednici su prisustvovali i predstavnici Federalnog ministarstva poljoprivrede, vodoprivrede i šumarstva kao i predstavnici Projekta općinskog okolišnog i ekonomskog upravljanja – MEG.

Članovi komisija su ovom prilikom razmatrali Prijedlog Uredbe o metodologiji utvrđivanja najniže osnovne cijene vodnih usluga u FBiH. Predstavnici MEG projekta su predstavili i prijedlog Programa za unapređenje vodnih usluga u Federaciji Bosne i Hercegovine i korištenje najavljene finansijske i tehničke podrške.

Naglašeno je da je riječ o veoma značajnoj temi za jedinice lokalne samouprave, te da je potrebno detaljno razmotriti predložena rješenja.

Komisije Saveza su usvojile određene zaključke koji će biti upućeni Predsjedništvu Saveza na izjašnjenje, a u svrhu zauzimanja stava Saveza po pitanju Prijedloga Uredbe o metodologiji utvrđivanja najniže osnovne cijene vodnih usluga u FBiH.



## ODRŽANA SJEDNICA KOMISIJE ZA EKONOMSKI RAZVOJ OPĆINA I GRADOVA FBiH, NA KOJOJ JE PREDSTAVLJENA ANALIZA UTJECAJA PANDEMIJE KORONAVIRUSA NA FINANCIJSKU POZICIJU JLS U FBiH

U srijedu, 28.4.2021. godine, održana je online sjednica Komisije SOGFBiH za ekonomski razvoj općina i gradova i financije. Na sjednici je članovima Komisije Gregor Jurišić, viši suradnik za finansijska pitanja Saveza općina i gradova FBiH, predstavio svoju autorsku Analizu utjecaja pandemije koronavirusa na finansijsku poziciju jedinica lokalne samouprave u FBiH. Ova Analiza ekspeditivno i temeljito nastoji identificirati, procijeniti i predstaviti intenzitet utjecaja krize uzrokovane pandemijom koronavirusa na prihode i potrošnju općina i gradova u FBiH, posebno na pojedinačne komponente lokalnih prihoda, koji su najizloženiji ekonomskim fluktuacijama uzrokovanim korona-krizom, te na segmente lokalne potrošnje, koji su najpovezaniji sa zdravstvenim, socijalnim i ekonomskim posljedicama pandemije koronavirusa. Također, u Analizi su analizirane i predstavljene i aktivnosti, mjere i prakse općina i gradova, koje su lokalne vlasti poduzimale s ciljem ublažavanja zdravstvenih, socijalnih i ekonomskih posljedica pandemijskih mjera, posebno u smislu olakšavanja finansijskih poteškoća restrikcijama pogođenim radnicima i poslovnim subjektima.



Članovi Komisije naznačili su da je Analiza izrazito koristan dokument i da će poslužiti jedinicama lokalne samouprave za njihove interne potrebe, posebno pri izradi izvješća i strateških dokumenata.

Članovi Komisije naznačili su da je Analiza izrazito koristan dokument i da će poslužiti jedinicama lokalne samouprave za njihove interne potrebe, posebno pri izradi izvješća i strateških dokumenata.

Također, članovi Komisije su razmatrali i informaciju o Strategiji razvoja Federacije BiH 2021.-2027., Nacrt Zakona o poduzetničkoj infrastrukturi FBiH, te Inicijativu za izmjenu načina obračuna indeksa razvijenosti u Zakonu o pripadnosti javnih prihoda.

## SAVEZ OPĆINA I GRADOVA FEDERACIJE BIH U POSJETI SRĐANU MANDIĆU, NAČELNIKU OPĆINE CENTAR SARAJEVO



U Općini Centar Sarajevo, 10.05.2021. godine održan je sastanak Srđana Mandića, načelnika Općine Centar Sarajevo, i njegovih suradnika, s direktoricom Saveza općina i gradova Federacije BiH (SOGFBiH), Vesnom Travljanin, i njenim suradnicima.

Direktorica Travljanin upoznala je načelnika Mandića s ulogom, značajem i glavnim aktivnostima SOGFBiH u prethodnom razdoblju i o planiranim budućim

aktivnostima, te je naglašena odlična i aktivna dugogodišnja suradnja između SOGFBiH i Općine Centar Sarajevo. Na sastanku je razgovarano i o različitim zakonskim propisima relevantnim za funkcioniranje jedinica lokalne samouprave, kao i o suradnji SOGFBiH s domaćim institucijama različitih razina vlasti, te aktivnostima SOGFBiH na međunarodnom planu.

Kao partnerska općina u ReLOaD Projektu, Općina Centar Sarajevo jedna je od pet jedinica lokalne samouprave u BiH koja je u proteklom periodu ostvarila značajan uspjeh i visoke rezultate na polju dodjele sredstava OCD, primjenjujući LOD metodologiju, odnosno praktičirajući dodjelu grantova na projektnom pristupu. U skladu s ovim rezultatima, direktorica Saveza uručila je načelniku dva priznanja: 1. za ostvareni uspjeh i napredak u transparentnoj dodjeli sredstava organizacijama civilnog društva i 2. za ostvareni uspjeh u uključivanju građana u procese donošenja odluka. Ova priznanja se dodjeljuju u okviru ReLOaD projekta kojeg financira Europska unija, a provodi Razvojni program Ujedinjenih nacija.

Na sastanku se diskutiralo i o financijskoj poziciji jedinica lokalne samouprave u Federaciji BiH i SOGFBiH Analizi pripadnosti javnih prihoda jedinicama lokalne samouprave u FBiH. Načelniku Mandiću su predstavljene problemi, izazovi i razlozi nepovoljne financijske pozicije lokalne razine vlasti u FBiH, kao i prijedlozi za jačanje ove financijske pozicije putem povećanja udjela općina i gradova u raspodjeli prihoda od indirektnih poreza s trenutanih 8,42% na 9,81% i putem povećanja minimalnog udjela općina i gradova u raspodjeli prihoda od direktnih poreza. Također, načelniku su predstavljene i glavni nalazi Analize utjecaja pandemije koronavirusa na financijsku poziciju jedinica lokalne samouprave u FBiH, pri čemu je naznačen intenzitet utjecaja zdravstvenih, socijalnih i ekonomskih posljedica pandemije koronavirusa na glavne komponente prihoda i rashoda općinskih i gradskih budžeta, kao i izrazita važnost uloge općina i gradova u suočavanju s izazovima pandemije.

Načelnik Mandić je izrazio veliko zadovoljstvo sastankom i naglasio da je u potpunosti spreman i otvoren za suradnju sa Savezom općina i gradova FBiH, kao i za aktivno sudjelovanje u radu i aktivnostima SOGFBiH.

## TEŠANJ I ZENICA KREĆU U PROCES SMART CITY DIGITALIZACIJE

Potpisivanjem memoranduma o saradnji od strane pet izabranih jedinica lokalne samouprave ozvaničen je početak realizacije projekta „Pametni gradovi – ka digitalnoj transformaciji gradova u BiH“, koji uz finansijsku podršku programa develoPPP.de Njemačkog saveznog ministarstva za ekonomsku saradnju i razvoj (BMZ), realizuju Deutsche Gesellschaft für Internationale Zusammenarbeit (GIZ), kompanije Lanaco i DVC Solutions i Bit Alijansa, udruženje IT kompanija u BiH.

Namjera projekta je da podrži progresivne lokalne samouprave u početnoj realizaciji njihove vizije digitalne transformacije u pametni grad. U fokusu je unapređenje spremnosti i kapaciteta JLS za procese modernizacije općinskih usluga koristeći, u svijetu prihvaćeni, smart city koncept i rješenja.



Grb Općine Centar Sarajevo

*U okviru aktivnosti na projektu ReLOaD, ovom prilikom načelniku su uručena priznanja za ostvareni uspjeh i napredak u transparentnoj dodjeli sredstava organizacijama civilnog društva i za ostvareni uspjeh u uključivanju građana u procese donošenja odluka.*

Gradovi Prijedor, Zenica i Zvornik i općine Pale i Tešanj će biti među prvim jedinicama lokalne samouprave u Bosni i Hercegovini koje će kreirati akcioni plan za digitalizaciju upotrebom smart city koncepta. Navedene jedinice lokalne samouprave će imati priliku za razvoj vlastitih kapaciteta i savjetovanje za uspostavljanje, upotrebu i dalji razvoj smart city sistema.



Pored strateškog aspekta i planskog pristupa digitalnoj transformaciji gradova, projektom je predviđena implementacija i prvih smart city projekata – „GoParking“ – razvijen od strane kompanije LANACO i „Građanska patrola“ – proizvod kompanije DVC Solutions iz Banja Luke. Jedinicama lokalne samouprave obezbijeđena je licenca za navedena smart city rješenja, uključujući i tehničku podršku sistemu za vrijeme trajanja projekta.

U saradnji sa UNDP-om planirano je razvijanje metodologije za akciono planiranje tranzicije u pametni grad (Smart City Roadmap) za čiju primjenu će biti obučene konsultantske firme i druge organizacije, koje će u budućnosti biti na raspolaganju i drugim JLS. Partnerske lokalne samouprave će provesti

proces planiranja i izrade akcionog plana za pametni grad. Proces planiranja će u značajnoj mjeri uključivati građane.

Realizacija projekta će doprinijeti većoj svjesnost o preprekama, zahtjevima i najboljim praksama digitalne transformacije gradova. Projekat će pripremiti lokalne samouprave da samostalno vode dalji proces transformacije uz pomoć organizacija iz Smart City Savjeta, poručuju organizatori.

Projekat će trajati tri godine, u periodu od januara 2021. do kraja decembra 2023. godine.

## VLADA FBiH IZDVAJA 30 MIL. KM ZA KAPITALNE INVESTICIJE U OPĆINAMA

Vlada Federacije BiH uputila je u parlamentarnu proceduru Zakon o izmjenama Zakona o izvršavanju Budžeta/Proračuna FBiH, kojim se osigurava da se 30 mil. KM transfera, koji su Budžetom/ Proračunom FBiH za 2021. godinu planirani za raspodjelu općinama i gradovima i koji su trebali biti financirani iz sredstava Međunarodnog monetarnog fonda, dodijele općinskim i gradskim proračunima, bez obzira na izostanak aranžmana s MMF-om. Naime, Vlasti Bosne i Hercegovine započele su pregovore s Međunarodnim monetarnim fondom, ali do sada nije postignuta suglasnost po pitanju strukturalnih odredbi iz Pisma namjere za koju je neophodna suglasnost na svim razinama vlasti. Sukladno tomu, pregovori još nisu završeni niti se može predvidjeti njihov završetak, tako da nije izvjesno hoće li sredstva iz ovog aranžmana MMF-a biti uplaćena u Budžet/Proračun FBiH.

Kako je navedeno u obrazloženju zakonskih izmjena, s obzirom na trenutnu finansijsku poziciju jedinica lokalne samouprave u FBiH, smanjenje prihoda općinskih i gradskih proračuna u odnosu na ranije godine, te nemogućnost općina i gradova da osiguraju izvore financiranja za pokriće deficita u svojim proračunima, izdvajanje sredstava iz Budžeta/Proračuna Federacije BiH za sanaciju posljedica prouzročenih pandemijom koronavirusa COVID-19, predstavlja im jedini izvor financiranja deficita.

Zamjenica premijera i federalna ministrica financija Jelka Milićević izjavila je da je stvorena pretpostavka da se u okviru budžeta ovom manjom korekcijom oslobode sredstva za općine i gradove. Naznačila je da će Federacija BiH dodijeliti ukupno 30 milijuna KM općinama i gradovima za kapitalne investicije

- Iz tih razloga Vlada je predložila izmjene Zakona o izvršenju budžeta po hitnoj proceduri, a radi se o manjoj izmjeni koja ne remeti ni likvidnost ni status Federacije vezano za zaduženje - kazala je ministrica Milićević.

Dodala je da će time biti stvorene pretpostavke da na vrijeme budu pokrenute procedure i raspiše javni poziv, te izaberu projekti koje će Vlada FBiH finansirati.

Milićević je podsjetila da su u 2020. godini prihodi Federacije bili manji za 12 posto, da je naplata indirektnih poreza bila manja za 13,8 posto, direktnih 4,8 posto, dok je pad kod doprinosa bio manji od jedan posto.

- U prvom kvartalu 2021. prihodi od indirektnih poreza bili su manji za 13 posto, što je i očekivano, jer se privreda još nije oporavila na nivo od prvog kvartala prethodne godine - istakla je Milićević.



Jelka Milićević, federalna ministrica  
financija

30 miliona KM za  
kapitalne investicije u  
općinama koje će  
Federacija dodijeliti po  
javnom pozivu

## SAVEZ OPĆINA I GRADOVA FEDERACIJE BIH U POSJETI DR. HASANU TANOVIĆU, NAČELNIKU OPĆINE NOVO SARAJEVO



U Općini Novo Sarajevo, 17.05.2021. godine održan je sastanak dr. Hasana Tanovića, načelnika Općine Novo Sarajevo, i njegovih suradnika, s direktoricom Saveza općina i gradova Federacije BiH (SOGFBiH), Vesnom Travljanin, i njenim suradnicima.

Predstavnici SOGFBiH upoznali su načelnika Tanovića s ulogom SOGFBiH kao zakonskog zastupnika jedinica lokalne samouprave u FBiH pred višim

razinama vlasti, značajem i glavnim aktivnostima SOGFBiH za vrijeme pandemije koronavirusa, planiranim budućim aktivnostima, pripremi Izborne Skupštine SOGFBiH, kao i s obvezom viših razina vlasti da konzultiraju SOGFBiH prilikom donošenja regulativa, koje utječu na funkcioniranje općina i gradova u FBiH. Također, naznačene su i aktivnosti suradnje SOGFBiH s različitim međunarodnim organizacijama- ambasadama Kraljevine Švedske i Švicarske u BiH, Vijećem Europe, UNDP-om, Svjetskom bankom, Kongresom lokalnih i regionalnih vlasti EU i NALASom, te ostalim mnogobrojnim organizacijama i institucijama u BiH i inozemstvu. Naglašena je i dosadašnja odlična i aktivna suradnja između SOGFBiH i Općine Novo Sarajevo.

Načelniku Tanoviću su predstavljene i problemi, razlozi i izazovi nepovoljne financijske pozicije lokalne razine vlasti u FBiH, pretežito izazvani sustavom otplate vanjskog duga u FBiH, neadekvatnom pozicijom općina i gradova u sustavu raspodjele javnih prihoda u FBiH, te prijenosom nadležnosti jedinicama lokalne samouprave bez prijenosa financijskih sredstava za izvršavanje tih nadležnosti. Predstavljene su i prijedlozi za jačanje financijske pozicije općina i gradova putem povećanja udjela općina i gradova u raspodjeli prihoda od indirektnih poreza s trenutačnih 8,42% na 9,81%, čime bi se nadoknadilo umanjenje prihoda temeljem sustava otplate vanjskog duga, te putem povećanja minimalnog udjela općina i gradova u raspodjeli prihoda od direktnih poreza. Također, načelniku su predstavljene i glavni nalazi Analize utjecaja pandemije koronavirusa na financijsku poziciju jedinica lokalne samouprave u FBiH. Pritom je naznačen intenzitet utjecaja zdravstvenih, socijalnih i ekonomskih posljedica pandemije koronavirusa na glavne komponente prihoda i rashoda općinskih i gradskih budžeta, nagli pad prihoda općina i gradova, kao i izrazita važnost uloge općina i gradova u suočavanju s izazovima pandemije.

Također, na sastanku je razgovarano i o različitim zakonskim propisima relevantnim za funkcioniranje jedinica lokalne samouprave.

Načelnik Tanović je naglasio interes za aktivnosti i zakonsku ulogu Saveza, kao i svoja očekivanja od suradnje Općine Novo Sarajevo i SOGFBiH. Izrazio je veliko zadovoljstvo sastankom i izrazio svoju punu spremnost, želju i otvorenost za suradnju sa Savezom općina i gradova FBiH, kao i za aktivno sudjelovanje u radu i aktivnostima SOGFBiH.

## EU4AGRI: JAVNI POZIV OPĆINAMA I GRADOVIMA ZA UNAPREĐENJE I RAZVOJ LOKALNE TRŽIŠNE INFRASTRUKTURE

Projekat EU4AGRI, koji finansira Evropska unija, objavio je Javni poziv za dodjelu bespovratnih sredstava investicijama za unapređenje i razvoj ruralne/lokalne tržišne infrastrukture u Bosni i Hercegovini. Kroz ovaj javni poziv, EU4AGRI će podržati ulaganja u infrastrukturu za aktivnosti povezane s poljoprivredom i ruralnim razvojem, kao što su zelene pijace, tržnice, infrastruktura i usluge za otkup, prodaju i distribuciju poljoprivredno-prehrambenih proizvoda kao i poboljšanje njihove kvalitete i dostupnosti na tržištu te razvoj kanala prodaje i marketinga.



**EU4Agri**

EU Support to Agriculture  
Competitiveness and  
Rural Development in BiH



Grb Općine Novo Sarajevo

*Načelniku Tanoviću su predstavljene prijedlozi za jačanje financijske pozicije općina i gradova putem povećanja udjela općina i gradova u raspodjeli prihoda od indirektnih poreza s trenutačnih 8,42% na 9,81%, te povećanjem minimalnog udjela u raspodjeli prihoda od direktnih poreza.*

Ukupni raspoloživi budžet namijenjen za ovaj Javni poziv iznosi 1.95 miliona KM.

Na javni poziv se mogu prijaviti isključivo jedinice lokalne samouprave.

Rok za prijave je 18. juni 2021. godine do 15.00.

EU4AGRI je četverogodišnji (2020-2024) projekat Evropske unije vrijedan 20.25 miliona eura čiji je cilj modernizacija poljoprivredno-prehrambenog sektora u Bosni i Hercegovini. Projekat provode i sufinansiraju Razvojni program Ujedinjenih nacija (UNDP) u BiH i Češka razvojna agencija (CzDA).

Više informacija o načinu prijave možete naći na sljedećem linku <https://bit.ly/3tHR97Y>



## OBUKA NA TEMU UPRAVLJANJE RIZICIMA OD KATASTROFA, ORGANIZOVANA ZA PREDSTAVNIKE LOKALNIH ZAJEDNICA

Mreža asocijacija lokalnih vlasti jugoistočne Evrope – Nalas, uz podršku Saveza općina i gradova FBiH organizira regionalni online kurs "Uvod u upravljanje rizicima od katastrofa". Za učešće na kursu prijavilo se oko 30 predstavnika lokalnih zajednica iz Federacije Bosne i Hercegovine.

Cilj ovog kursa je da se uposlenici u lokalnim zajednicama upoznaju sa modernim konceptima i praksama upravljanja katastrofama i doprinesu promjeni od reaktivnih ka proaktivnim pristupima u ovom interdisciplinarnom polju razvoja.

Kurs je započeo 12.05.2021. i obuhvata 3 modula, a učesnici imaju na raspolaganju narednih 6 sedmica da završe sve obaveze: pročitaju materijale, odrade zadatke, učestvuju u forumskim diskusijama, itd. Takođe je obezbijeđena kontinuirana podrška moderatorice kursa. Za sve članice SOGFBiH kurs je besplatan, a učesnici koji ga uspješno završe će dobiti certifikat.



Gledajte Savez općina i gradova  
Federacije Bosne i Hercegovine na



facebook  
Savez općina i gradova Federacije  
Bosne i Hercegovine

Poštovani čitaoci,

putem ovog biltena pružamo Vam mogućnost da se informišete o aktivnostima Saveza, o bitnim dešavanjima u općinama i gradovima, aktivnostima naših partnera, institucija vlasti, kao i o razmjeni najboljih iskustava i praksi.

Na ovaj način pružamo informacije o održanim sjednicama organa i tijela Saveza, konferencijama, seminarima, radionicama, okruglim stolovima, javnim raspravama, projektnim aktivnostima i sl.

Ukoliko želite da se prijavite za primanje ovog biltena možete to učiniti tako što ćete poslati e-mail na: [dino@sogfbih.ba](mailto:dino@sogfbih.ba); ili putem popunjavanja forme na našoj web stranici.

Molimo vas da informacije o našem biltenu prosljedite svima u vašoj i susjednim JLS i drugim zainteresiranim.

Ukoliko želite da objavite neke od vaših novosti, iskoristite bilten Saveza koji je brz i efikasan način komuniciranja.

Sa zadovoljstvom očekujemo vaše komentare, sugestije ili primjedbe.